

四庫全書

集部

欽定四庫全書

集部

儼山集卷十五

詳校官庶吉士臣李如筠

中書臣劉源溥覆勘

總校官庶吉士臣何思鈞

校對官助教臣卜惟吉

謄錄舉人臣蔣雲師

欽定四庫全書

儼山集卷五

明陸深撰

五言古詩一

三十七首

園中芭蕉產甘露金色若蓮花而大幾盈尺欣

賞一首

園古草木茂氣和休祥集老堪寄一壘當此三江入綠
蕉隱輕霧紫葩垂巨實駢房類馬齒厚味過蜂蜜蟠桃

經千歲優羅竟誰挹縹緲仙人掌馨香鸚鵡粒珍竒徒
飽聞何如手可拾文園素中消起痾冀一吸太華玉井
蓮菡萏黃金濕孤標自無羣惆悵臨風立食芹想明主
欲起為什襲倚檻良有情寒芳偶無術把酒一賞之拊
膺百愁失還聞制頽齡大藥儻可及欲草貞符篇緬慚
春秋筆

聽雨

白髮日夜長青草緣堦生江村荷時雨潮田愜耦耕稍

稍辨遠樹依依見孤城魚鳥亦何意上下如有情撫已
得良晤與物本同生遭逢百年間重陰幾開晴

儼山西偏鑿方塘而未及泉四面窪空若壁適
春潮暴漲懸溜而下若珠璣萬斛水晶簾一
段迸空垂舞噴射照耀奪人目睛而衝撞瀾
湃頃焉出聲又若張樂洞庭之上信天下之
奇觀也作詩紀之

九天落銀河一部喧水樂自昔飫奇聞于茲破塵濁東

風吹海門潮頭擁蛟鱷漫坡已鋪練溜崖遂懸瀑雅音
發鏗鉤天籟韻宮角橫開水晶簾亂颭珍珠電迴風拂
漚沫落日漾澆瀾排波摧冰霜蕩空驚鶴鶴雖慚達人
觀緬希百川學無私理則然盈科仰先覺嗟予方寡陋
昔賢何渺邈垂老卜此居偶爾期浣濯林木日已繁茅
衡向堪斲相要素心人文史事商摧

慶壽寺西廊齋居贈沈仁甫

山陵屆良吉羣寮秉精誠梵宮庭宇靜願託塵土形華

鐙照木榻四面淒以清壁月度雲漢珠斗當女城值我
同心友相依敘平生弱齡結高誼白首有定盟君為澗
中水我如隨風萍萍飄入澗水蕩漾水合并

送王存約赴惠州

遠別當長歌歌短調轉苦鄙生寡諧合屈指那可數夫
君重意氣交誼薄太古豈惟到爾汝未暇辨賓主同懷
奉聖明何心慕纓組契闊萬里途恨無衝風羽客宵仰
雲天明星燦三五

清河曉發

清霜肅晴野秣馬乘暗發長達會淒風疎林薄殘月三
五東方星橫斜北斗沒似聞度前陂苦寒傷馬骨

遊虎丘憇劍池上作

盤石廣且平萬木鬱以蒼中有高樓臺翼翼何煌煌黃
金塗殿柱五色錯中堂問是誰所居緇衣禮空桑感此
金石固變遷不可量始因伯業顯中更晉諸王况以血
肉軀焉得久樂康促膝臨澗水澗水清且光澄碧照我

衣可辨黑白黃俯身濯長纓素手激清涼適意易為別
悵悵不能忘

西堙曉發

日出山霧黃五月氣猶肅溟濛十里餘轅馬傷局縮豈
不憚馳驅所欣恣余目沈沈樹隱岑稍稍黍抽陸仰觀
雲中岫俯視澗底谷境深工出奇地古尚餘樸駕言問
民風十稔九無熟巖嵌時突煙委複闕土屋行行重嗟
咨明光竟遺覆予本登才賢幽探事陶育撫此晉陽區

孱綿愧食肉

送王憲副廷吉赴蜀

出郭已可愛何況郊外遊十里歷大陸偶此值杪秋黍
稌畢刈穫蕭條見高丘密雲釀微雨輕塵斂前驕送客
遠行邁道路阻且修臨歧一觴酒去去不可畱丈夫懷
明德忤別難自由

雜興

江河赴東流日月西馳速天運有乘除人事工報復如

何首陽薇一去無後祿子雲最和同符命手自錄婉婉
舒我言往往覆人國叶亦知重身圖誰家非骨肉伊余
六尺軀寧用千鍾粟禍福止一時安能辨直曲浩歌歸
去來田中有茅屋

晨起南牖納涼

庭柯含遠風時暑散煩襟豈乏華屋爽適我良所欽頗
愛陶彭澤五斗北窻陰南薰來前楹何必懷千金野居
自云樂俯仰遂素心素心亦何有息影睠山林歲月忽

已邁江湖一以深手持一編書中有太古音誦言消永
夏是非遺昨今

坐月效古

肅肅迨秋夕明明月流光衆星燦若珠三五正縱橫居
人不能寐客子懷故鄉大化無停運弦望倏相當鴻鴈
多哀思庭柯變青黃時往老將至悲來夜何長咏彼兼
葭詩悵望宛中央

儼山精舍晚意

林深暮煙紫海近秋月白稍稍神慮淡悠悠寺喧隔乾
坤等逆旅誰非遠行客遣此百憂端棲我一畝宅楚狂
雖忘世湘纍竟何益寄情混漁樵託契友金石

新秋別三首送唐士回

悠悠都門道執手從此辭明時各致身那復計別離君
已寄民社我愧空文詞相視各不語秣馬當風嘶馬嘶
識故道落葉戀故枝仰視雲漢間牛女將秋期

二

潞水日滔滔豆花復離離新涼動長河樓船正南馳相望日已遠何以慰相思願多東來風吹鴈過京師樓頭夜初水起坐薄羅幃團圓向人月鑒我懷中私

三

與子三歲間一歲一聚首人生少百歲能共幾尊酒子年三十餘我已二十九後時聚散期日月能俟否同心多此離良會不可久奈此參與商任運付何有

遲巖介谿太史

遠至卜燈穗近約嗔路遙娟娟十載別盈盈中夜潮僻
地安足賞佳人
不待招榆柳含新妍
泉石共孤標雖慚
陳子榻迺有顏生瓢
開徑屢延竚永冀念久要

我有平生人二章

我有平生人故被雲錦裳
灼灼桃李顏娟娟饒清揚
婉婉吐麗辭纖纖素手長
後宮選名姝三千一身當
遠從二妃遊歷覽周八荒
膏車駕言邁使我涕泗滂
念君不能已謳吟遣巫陽

二

我有平生人善鼓朱絃琴清商發高彈泠泠太古音萬人羅列聽歎息一何深玉衡指孟夏朱明自南侵曲中正悠揚絃絕調不任鸞膠是何年長令負此心豈不增悲辛古意日已淫

連理詞

挽畢封君

春草碧高阡春晴寒日煙下有雙白壁上有芳樹連連理復連根根深葉何鮮大枝高一尺蒼蒼欲擎天孫枝

復秀發直起拂雲穿樹色耀白日壁光掩重泉

出土城卽事

粼粼原隰遠遲遲麗景晴始欣出塵想遂暢同物情天
桃出積垣曲澗縈舊京民俗遠漸朴山照去猶明天闕
古無對邊塵今自清撫時感雨露緣禮報生成因公遂
攸徃倡言紀茲行

發昌平

山城麗淑景沙堤度輕輿身從雲中歸疑有雲生裾離

離列巘嶠藹藹越里墟時有桃李花無言臨澗隅

雜詩

苦乏山林資來此朝市遊日月不相待華髮變清秋
心中道獲懷懷末路憂浮陰隱層城輕冰結洪流孤語
冀冥契同逝匪良謀緬慙南征鴻豈曰道里悠

遊潤州城南諸山

日斜始取路春服遂遊行街迴復巷轉西望見嶺嶺道
旁車輪推啣啣何嚶嚶平濤灌時蔬健婦日把耕意愜

勦不辭奮步直前征荆榛鉤我衣煙霏拂我纓忽焉凌
絕頂俯視江與城一氣漫浩浩清飈四傍生藉草聊小
憇為樂不可名暮景漸微茫欲下仍含情

晨發柯村

藹藹山川曲朝曦散秋光草露尚未晞嶺樹變微霜白
雲滿長谷此中多深藏遵養共時晦滅景不可望擾擾
倦行役拙誠難可將

上峻坂臨崖

少陵有佳句再拜扶病翁掖予登峻坂此事將無同好
竒已成癖履險始有工流泉噴玉雪危石搖青紅下臨
千仞淵上摩九萬風秋陽正皜皜極目雙飛鴻

率童僕出田

旭日照桑塢乳鳩拂林坳農務日就理駕言赴東臯東
臯有佳適云是江海交彌望眇孤帆凌空俯危巢伯禹
功未泯季札風猶高戢戢出土女田田及土膏鹿門有
遺響子雲徒解嘲違已詎非病喟予傷繫匏

理園

庭下石齒齒水際花冥冥宿痾霽暑雨時還枕孤亭百
慮靜以遣世紛老旋經所存復餘幾兀然顧茲形呼童
理荒穢森爽出衆青宣父歎後凋湘纍春芳馨孰云草
木姿奄忽隨飄零持此遂久要庶以娛暮齡

秋懷

仰觀流大火圓魄復西馳未覩凌霜葉先見隕風枝羅
幃悶清景瑤瑟流哀思掩抑不成調清商汎朱絲恐驚

高樓婦蕩子阻歸期

贈別安鴻漸給舍四首

西馳萬里道送子不及遠萬里非所嗟
覲子恐歲晚青
青蠶叢山歷歷太行坂素冠集流塵
客子中夜飯驅車
當周行相顧各繾綣

二

繾綣夫如何欲語不出口冥冥雲中禽
窈窕道傍柳炎
暑方載途客行日彌久山川氣候更
風雨昏旦有母為

人所先寧為人所後

三

青城多異境蛾眉隱新月巴江從中來紆曲如一髮秋
氣勁梗楠春陽長薇蕨地高魚鳥閒天近星斗沒行歸
及桑梓山川共輝發

四

君還江水源我去江水委江中多鯉魚尺素來萬里遙
涉岷漢流復泳沅湘沚海門何浩蕩但恐風波起江干

候鯉魚秋高水瀾瀾

儼山堂遲友

淡煙釀朝冥細雨含秋姿獨立更延佇悵望遲所思麗
容本絕代被服何陸離一為經時別悲喜極感持徽音
寄篇翰徃徃追四詩知己自曠遇佳會貴及時大業日
云遠非子誰與期

移居寄子容

予本四方人慷慨赴天路幸託金蘭交再蒙鹽車顧端

懷素居憂豈乏同袍賦側身向長安凝望幾朝暮浮陰
結苑墻年華落宮樹是非金玉姿安能磐石固時欲往
從之駕馬不能步相思在相知因風寄情愫

送徐進士昌穀湖南纂修

丈夫及壯辰足迹徧川谷送子湖南去佳勝付遐矚渺
渺洞庭波盤盤衡陽麓朝鱸武昌魚暮聽瀟湘竹嗟此
赤壁灰悲彼長沙鵬雙旌動秋色俯仰如新沐境內三
千里候吏豐館穀山水富竒聞歸借南遊錄

發西店驛

海嶠不可即林巒互盤縈依依度阡陌靡靡事前征僕
夫祇趨鶩昏曉各有程豈不愛歲月娛此山水清少小
四海志老大竟何成伏轅傷局促履境戒高盈南中氣
候早三月競深耕林煙起菑畬園風動茅衡物華遂敷
暢旅懷倦將迎喧寂會所適感歎重含情

儼山集卷五

欽定四庫全書

儼山集卷六

明陸深撰

五言古詩二 三十五首

贈別徐昌穀二首

北風吹我衣送子山之隅一瞻再三顧別離在斯須知
遇良獨難工瑟徒好竽感念管鮑私安得不區區昔為
比翼鳥今如失水魚一日為三秋悵望增欷歔

二

北風被原野送子古郭下叶僕夫遠前途執轡柔如組
屏營復躊躇氣結不得語許身忌太炫榮名毋多取珠
明蜃人心玉縝良工苦寄言同心人蜂蠆多風雨

夜宿爛柯山農家

爛柯本在金華不知此何以名

夜扣田家門空庭列松炬導之上小樓一室有雅趣木
榻久已塵頗勝棲草露雞豚棲下方警戒煩再顧雖無
窮途哭必有神物護時勅符俱從老農拙言辭起拜具禮度

感此深山深土風儼淳素

武卿山中晚行

水流青山中人行白雲處落日下西崦餘光拂高樹此
行何所有一眺空海宇慚乏山林姿來此成賓主

閒居擬陶

林居罕人事漸與農圃親時還讀我書夢寐見古人桃
源亦何有傳說失其真藹藹風日妍鬱鬱草樹春儻免
病為累吾亦愛江濱

寓彰德倉司小憇頗有花竹之觀

愧乏瀟灑趣享此山林居時花當春發喬木向日舒好
風汎崇光有鳥鳴前除坐久起顧影悠然思遂初去住
各有適得喪兩無餘

雨後分種秋葵

早葵花已繁晚葵始萌滋迎陽與應肅物性各有宜吾
欲備四氣代謝任所之往者固已爾來者當自知人生
會有適遲速何足疑但願風日妍臨秋挹高姿睽此尺

寸間尋丈以為期殷勤付畦叟愛養貴及時

登翠華巖上洞

窮高暢遠矚躋勝酌良緣京塵動千尺往來成歲年偶
上翠華洞間尋舊鏡鑿無煩辨人代惟知出風煙長安
近捧日韋曲低去天惟皇朝萬國聲教被八埏振策一
以眺高雲下淵泉德輝九苞鳳形勢百足螭

新晴病起獨登臺觀耕

東曦散早涼沃土依水曲宿雨一以霽微風滿疇綠農

人欣及時物情遂所欲稼穡良獨難勤惰各有屬夙疴
幸暫舒登臺恣遐矚饁餉偕爾鄰指揮顧我僕新苗舍
露滋把愛等蒼玉稍稍已成行纍纍尚盈束苟遂豐稔
期寧知泥塗辱倦遊拙理生藉此一屨足

齋居

園林變夏木弱軀猶春衣豈乏四方志瘖馬不能車偃
息滄江涘水竹既清虛悟悅有夙契冥詮資簡書翔禽
懷佳音時雨鳴前除境適謝力遣迢遙遂忘予

風琴

予蓄二琴客為調之偶置亭間適天風微動自出異響客歎希有作詩紀之

陶令無絃趣未忘矯俗心退之聽穎師哀怨一何深伊
余兩瑤琴因風調至音乍如落松濤復同驅龍吟掩抑
竟何有斷續難自禁悅耳貴一適傳指勞千金乃知宇
宙間喧寂寄所任大化本無迹至理不可尋以余疎慵
姿置之風水林

碧雲寺觀泉

堂辭白玉前寺到碧峯下石幢插渚波貝葉翻般若循
除決清泉此境極瀟灑琤琮金佩傳宛轉玉繩瀉緬懷
川上心臨流歎不舍曾聞貂璫雄揮金事游冶高臺相
掩映松篁雜梧檟似識舟壑安寧知蕉鹿假止觀等般
鑒洗酌泛周筆

臨清車行

南人不識車北人不識舟二者更相苦役役不能休吾

生本丈夫安能絕行遊生長東吳郡偕計來皇州歲暮
風日烈行行阻且修黃塵翳白日四牡駢梁輶未明候
晨雞殘更進薄羞堅冰交狐豕寒疇下羊牛疎林希突
煙迴野多荒丘觸目集野意撫時縈羈愁豈不愛遺體
高居詎良謀遑遑念饑溺遐思禹稷儔

秋懷

斗杓西指申興言懷幽詩玄蟬泣高柳玉露零泥泥急
景如受驅少壯誠幾時丈夫懷苦心飄泊將奚為悅彼

庭前樹芳花綴繁枝莫俟涼風欺果實獨後期

題畫

關河凍初合雲物歲已晚紆轡雞鳴樹悵望羊腸阪徘徊不能度風高馬毛短

陳光祿惟順迎暾書舍四首

龍泉

瀑布下匡廬倚天垂玉柱瀟瀟六月寒坐對白龍舞幽人送目餘新添夜來雨

寺鐘

蒲牢吼蕭寺明星出東方動息各有會隨風遠飄颻喚
起巫山夢縹緲賦高堂

漁歌

愛聽江湖調滄浪第一聲桃花新水浪搖動楚王城得
魚沽酒處風雨更多情

樵語

風暖鳥聲喧隔塢聞人語盤雲拾墮樵晨昏自來去深

山多虎狼同心邀伴侶

予家舊藏瀟湘圖聊因舊題各成短詠八首

山市晴嵐

山以遠市珍山中復成市輕雲結浮嵐東風瀉清泚不
辨往來人微喧隔林起

漁村落照

風波本無定漁家愛夕陽絲綸搖颺處多在灤西傍清
歌一曲竟天水共微茫

煙寺曉鐘

清曉坐聞鐘，知是何朝寺。
微霜動商飈，秋隨鴈行至。
聯翩去鄉人，豈無懷鄉意。

江天暮雪

雪片大于手，江空歲復寒。
幽人高卧處，偏得畫圖看。
為問梁王簡，何如楚客冠。

瀟湘夜雨

扁舟瀟湘上，夜聽瀟湘雨。
回風度明璫，叢篁各成塢。
欲

起寄相思美人隔南浦

洞庭秋月

月光隨處好
何況洞庭秋
風露三千里
金波上下流
此時聞鐵笛
天際一登樓

遠浦歸帆

孤帆自天際
出沒見秋毫
歸心同逝水
飛度挾風濤
臨流一悵望
空覺此生勞

平沙落鴈

鴈陣驚寒早平沙襯水圓同懷稻梁意南下盡翩翩誰
念關山遠猶有尺書傳

玉華雜咏七首

為盛程齋賦

玉華山

海風吹海雨飛過玉華山
山中人不見窈窕翠微間
得月乘鸞度開雲放鶴還

白雲窩

雲來如有情雲歸本無跡
歸去羣山青來時林樹白
窩

中卧雲人偶值愛雲客

萬柳塘

千條萬條黃垂柳復垂楊連雲難辨色
陰月不留光幸不當岐路別離那復傷

望湖樓

登樓望澄湖樓高湖面小金波月裏秋
青草雨中曉心閒境逾靜悠然見魚鳥

韓山

一髮韓江水韓山相對起扁舟乘海潮回首渺千里上
流春雨多夷猶弄清泚

越王走馬埒

燕臺骨已朽渥洼種未生何年走馬埒尚帶越王名榕
葉斜陽外坐看海雲輕

鶴舟

買得青田種相攜共一舟碧簫吹夜月飛度百花洲借
問華亭唳何如赤壁遊

過安山几間有高達夫集偶拈東平路作一首

戲效其體

飛鷁拍金臺揚帆出鉅野細柳縈長隄新蒲弱堪把煩襟散遙岑好風送朱夏

七言古詩

四首

雲山圖贈嚴介谿西還

美人別我還楚封遙望雲山如畫中憶昔燕市初相逢
年少意氣雙飛鴻鵠來射策披心胸五雲旭日蓬萊宮

玉堂對榻聞曉鐘南郊獻賦追揚雄旁人忽忽稱儒宗
文彩往往驚相公過從莫限風雪衝卜居長安家屢通
眼見天日升潛龍石渠夜照藜火紅退食聯步時從容
移書論道相磨礮豈徒握手期協恭自信肝膽摩蒼穹
今我日月催衰慵近有白髮臨青銅世事浮雲無定蹤
况子縷經儼在躬十年契誼蘿施松一旦摻袂成西東
人言此圖千萬重我意試比應難窮

中山圖次韻俞國昌都諫送許補之侍御謫定

州

中山風物美且都無乃賢達避世區
芝山許子今鉅儒
虬髯逸論如大蘇
隻手欲作回天圖
七月詔獄朱顏敷
我生有癖情且迂
辱子契誼時與俱
兩都三試要不殊
空憐警警夜鴈有
奴寂寞府中棲
樹烏刺割修復見
昆吾
聊試兒童夾道呼
中山山中勸種榆

月夜與高進之沈德楨諸友過韓山次壁間韻
擢歌欲停山月吐
月影照人清可數
疑心已斷壁間蛇

壯氣猶驚草中虎清溪曲曲淡不流此月重來猶故我

秋思

空庭蕭索簾櫳雨秋色漫漫四山裏閒花不語傷朱顏
落葉無聲風未起依稀三五少年遊鳳凰臺畔臨吳楚
家書自恠滿紙題猶剩胸中數行語

儼山集卷六

欽定四庫全書

儼山集卷七

明 陸深 撰

五言律詩一 六十首

何舍人館中對雪

燕地春猶淺，高城雪更明。
相逢為客處，同有望鄉情。
棧閣因風積，樓臺入夜清。
不知梁苑賦，何似蔡州城。

過盧溝橋

野適意自愜逢春更可憐
弄黃初試柳破碧已分泉
馬足騰晴霧雞聲隔午烟
翠華巡幸日馳道直如弦

孝廟挽詞

帝座宵沈彩皇祇晝嘯風

時巳午之間上賓申初有黑風從西北來拈地揚塵咫尺

不辨人懷三代治天忌萬年功
袞冕丹青裏山河涕泗中
聖恩如可報精衛海濤東

下陵

片月青山外遙燈綠樹中
馬蹄知熟路人語雜回風臺

殿參差出冠裳彷彿同穹碑猶入望揮涕憶神功

對月

連夜月色好此宵看滿輪金波惆悵裏碧海別離新水
雪南征鴈關山北望人琴書照清影舟楫對通津

假寐

假寐依洄洑篝燈伴水雲晚潮隨月上歸鴈帶霜聞地
古三江合星移五夜分冥行吾豈敢露宿畏離羣

三日出大明門

日華麗高閣風光媚輕塵喧喧車馬動藹藹歲年新花
柳回芳甸關山念遠人履端逢泰運大饗卜明禋

賦得玉河煙柳

御堤新水上細柳織輕煙隱映金鑾外低回玉甃前曉
容橫一抹春色試三眠地接天門近常霑雨露偏

得劉子書

念子不能寐中宵鳴素琴近聞衡嶽去遙望楚江深入
夢多岐路緘書有好音隔窓風雨橫愁絕故人心

寄李獻吉

客到梁園者仍煩致起居夜來新有夢春去久無書綠
野深花徑黃河抱草廬迢迢千里道目短鬢蕭疎

和張玉溪山行

一徑出林坳四山開畫屏霜鐘度遠寺雪柳帶長汀路
轉城闌出雲深石洞冥千年埋玉處龍氣晝常扃

華蓋殿外候駕雪中有懷崔後渠嚴介谿上陵
此去西陵好花驄並轡行橋山瞻王氣禮殿肅精誠候

吏供宵飯歸鞭促曉程立殘金殿雪憶爾到昌平

分水祠漫成

江頭十日坐無日不吁嗟綠暗連天柳紅明委地花銜
泥新燕子傍水舊人家南望無終極青天又一涯

谷亭經舊寓

土屋曾為客朱炎夜見星棗林連驛路麥飯趁魚腥萬
里看雙鬢三年抱一經經行重俯仰楓樹晚冥冥

過清河煙霧不見山

春氣濃如酒沈沈醉遠山愛飛孤鳥沒隨意片雲閒興
為尋芳發塵憐撲面還石橋流水漫立馬聽潺湲

徐州洪次韻

表裏山河勝東泉復上流斜陽明石佛古堞遠徐州谿
影尤宜月潮聲不待秋去來風雨橫竒絕冠茲遊

月下抵彭城

險中不覺險家近轉思家世路元無盡人生故有涯鄉
音傳白苧秋事付黃花今夜彭城驛清尊對月華

寶應晚泊

天接湖光迴雲開塔影圓
老漁明宿火客子傍歸船
晚市風聲靜秋沙月色偏
絕憐淨如練閒擬謝公篇

渡江

幾日江南路靈旗發畫船
江流餘舊日山色入新年
風細蛟龍卧雲開虎豹眠
夕陽京口聞吟興酒尊前

過丹陽

平明辭鐵瓮日暮過丹陽
遠道初知客方言忽近鄉
苔

封聯艇綠泥沈小車黃柳暗河橋下平分麥秀涼

遊金山次唐韻

過水金山寺真憐地脈分潮聲生絕壁江影墮孤雲涼
吹先秋到長歌入夜聞登臨殊不極斜日伴微醺

嘉定登圓通寺佛閣次王節推韻

酷暑宜高閣時花上檻紅水沈銷活火冰簟受南風烏
背層霄外龍腥古鉢中晚涼頻徙倚村郭失西東

黃純玉之再遊龍華也予不及再陪悵然次韻

浦口橋西寺水深塵事稀重來黃叔度尚憶陸探微霜
後驚紅樹天南望紫微還將五色手歸補袞龍衣

遊昭慶寺

秋風昭慶寺初日滿迴廊地古松能偃山深橋未霜移
舟還傍麓著屐試登堂高閣凌雲表憑闌意自長

坐月喜易欽之見過

方庭兀坐久漏水靜來聞雉堞孤雲補旗竿片月分鄉
心基遠夢涼意感微醺賴有同心者敲門慰藉勤

題竹送張鍾美侍御按雲南

臨岐欲有贈贈此比琅玕南國多炎暑因君見歲寒風
雷山嶽動瀟洒畫圖看白雪真難壓青雲亦可干

晚過元明新居

歲暮天涯客相依願好鄰樓臺殘夜月梅柳隔年春契
誼憐知己馳驅愧此身浮雲終日事偏感異鄉人

苦雨

長安十日雨雨中孤客愁泥深妨著屐鄉遠怕登樓水

氣偏欺日雲陰每妬秋不知畿甸裏禾黍尚堪收

月下與張碧溪汎舟

微月墮止水空明漾淺沙放舟沿柳岸看竹過鄰家林
靜一枝鳥溪喧兩部蛙不應張博望別自有仙槎

贈沈舉人銓

歲晚風江闊天空朔鴈孤君行自水雪吾意且江湖驥
北千金價鵬南萬里圖文章關國運把酒對青蒲

儼山春曉二首

濛濛連夜雨，曲曲帶溪山。
隔水分喧寂，經旬斷往還。
天連滄海近，人比白鷗閒。
多藉東風力，吹春到閉關。

又

初有江山勝，况逢花柳春。
曉雲含宿雨，暖吹約輕塵。
樹裏看孤擢，煙中辨四鄰。
幾年京國夢，喚醒愛閒身。

寄孫思和

竟負回舟約，虛煩下榻留。
惟餘三畝宅，遙望七峯樓。
天接星文動，江涵鴈影流。
煙花正無數，老眼幾時休。

雨中行史涇

江路西南永端陽亦不晴
草堂松粉潤花塢蘚痕平
橋古行人跡田低過水聲
茲遊自竒絕雲樹望中生

六日雨二首

郊居世塵少農月雨聲多
暝色連葭蕩繁陰動薜蘿
歌謠終帝力霑潤即恩波
漠漠江天外時時白鳥過

又

長閒緣性懶愛雨為年豐
入夜聲逾急因風勢轉雄
燈

前歌病枕江上憶漁翁亦有滄洲興相期泛水東

南浦阻風

西風催逝水一片布帆輕渺渺江鷗去離離錦樹明興
高偏有恨秋老最關情咫尺谿南路天留訪戴行

留布金寺

宿宿俱投寺行行莫問津麥波搖落日花雨戀殘春水
國攻農事禪房清世塵鄉心與野意從此往來頻

秋齋夜聽雨二首

鸛鵲林棲盡秋牕細雨來野雲天共遠涼氣夜交催簷
溜斷仍滴燈花落更開幽人心賞足孤詠寄高懷

又

南畝苦刈稻秋風無送寒老農春舊穀紅女搗殘紈暗
響隨黃葉疎香消紫蘭物華知節改加意幾回看

宿碧雲寺

西崦碧雲寺天空近太微堂虛寒吹入簷宿暮雲歸聽
履仙卿集留僧錫杖飛偶因方外勝殊覺世情非

次韻嚴介谿上陵

帝遣修陵祀秋來得並行
雨聲連日夜山色洗幽并
遠道防殘暑齋心冀晚晴
敬皇弓劍地揮淚想西征

酌別何舍人無問訊空同子

年少誰如子他鄉怯病身
春風滿歸路幾日罷征輪
塵合青山遠河開碧樹新
故園如見月應念未歸人

贈別王瑩中二首

孤舟連夜發客子念還家
遠道多秋卷高城急暮笳
一

身籠外鳥萬慮壁間蛇春色淮南路江籬繞白沙

二

愛爾不能住高樓空暮思浮雲連日脚流水繞天涯未
有孫陽遇虛煩楚客辭故園江上好風詠况相宜

五塢山房為盧師陳賦

不是黃金地毋煩白石歌春風湖上路夜月鏡中波
插案圖書在緣堦蘭桂多遙知梅雪後杖屨待經過

晚自西堤攜楫兒散步

夕陽江水外曲曲帶沙堤生意隨汀草閒心付杖藜漁
舟天上下人語讓東西稚子偏憐我相攜過竹谿

赴儲芋西少參中途過陳氏莊避雨

合下陳蕃榻真成訪戴行燕泥妨馬力花雨弄春晴十
里緣江路中年故國情不須團蓋擁風澹正雲輕

人日雲二首

院深勤掃地簾靜愛聞香墮壑隨風力穿雲逗日光山
城閣道迴松徑石衣長欲試煎茶水丁寧近竹房

二

人日歲常陰今年雪更深
天空山競出春早柳難禁
四海三農望孤城獨客心
故園江上路梅塢有誰尋

看雲

筠簾瑩水紋開簾卧看雲
隨風還作陣映水復成文
出岫連綿起竒峰次第分
更能呈五色持此獻明君

人日

春日復人日鄉心亂客心
東山遊不到西嶺雪常陰
城

郭林泉繞風雲殿閣深
梅花臨水發拋事且須尋

月下行舟

水曲風帆渺雲開月殿圓
金波千片動珠斗半空懸
樹影連山合歌聲入夜妍
舵樓高似屋歸興坐來偏

蘭溪道中

朝日暉江路平林映遠山
宿雲收不盡高鳥與俱還
秋草弄幽色寒松有好顏
時時上高瀨隱几聽潺湲

教巖暮發

向夕秋山紫西風吹白雲納涼移榻屢待月引杯勤頰
樹參差出漁歌次第聞去留俱有適吏隱欲中分

宿建昌縣公館聽雨和周玉巖都憲

五月溪山路水深雲更深溪梁連近麓帆影掠長林巨
浸愁農事重陰傷客心翻將經濟意時向簿書尋

鄱陽湖

家居滄海曲觀水入雲天斜日番君廟西風鄔子船草
封高岸沒波合斷山連起擊中流揖秋光滿大川

望雲居

道遠山初近，天長晚更晴。
水從星漢落，舟在畫圖行。
擊楫吳郎計，乘槎漢使情。
難將物外意，空博世間名。

萬載冒雨曉發途中次韻

逢迎南至日，上盡雨中山。
人過龍行處，雲生馬度間。
征旗殘畫捲，弛擔隋樵還。
阮籍何心者，予方索笑顏。

二

曉行隨落月，細雨暗前山。
天地陰晴裏，風雲變態間。
遠

裝初覺重濕鳥并知還捲幔峯巒接丹青有好顏

儼山集卷七

欽定四庫全書

儼山集卷八

明 陸深 撰

五言律詩二 五十五首

龍窩驛

一名雙溝

遠道悲遊子
春光滿驛亭
幽花背巖發
芳草上洲青
帆影連銀海
山形列翠屏
何如張博望
光動女牛星

自滎澤渡河

清曉輕塵濕長河新水通一宵花信雨兩岸麥秋風禹
跡微茫外鴻溝指顧中七年三問渡南北更西東

初從木罌渡水欣然忘危步入山菴小憇

病骨難為路春容半帶陰木罌初渡水山寺不藏林脫
險初經險違心却負心楚雲天共遠聊復一登臨

過趙州

當代朝天路猶餘望漢臺地分三晉古客過萬山來霽
雪留殘照輕車動早雷望窮天北極紫氣繞蓬萊

自下邳晨渡

殘月曙猶上，斷冰寒更流。
風回青雀舫，塵滿皂貂裘。
勲業匱中鏡，英雄水上樓。
行人連日夜，陌上重回頭。

汶上

汶上棲賢地，風塵愧此行。
天寒日力短，道遠旅魂驚。
不醉任城酒，空懷賀監情。
浮雲亦何意，常為碧山橫。

西望太行諸山

白日如送客，青山解迎人。
半空橫疊嶂，萬里一孤臣。
澗

積過年雪風迴隔歲春井州雖暫住難比故鄉親

石鐵村乘月行

一名什
貼有鋪

片月新秋裏行人山路中晚涼微帶露宿雨尚含風
星炬參差列肩輿宵窳通去程迷遠近時復問西東

陽武道中

冬日如春暖河水斷復流塵中藏去馬天際出危樓
周道真如砥行人那可留風霜雙短鬢失計為身謀

井陘道中雪甚

井陘天下險何況雪中過絕壁看雲嶂危橋下玉坡奔
騰千駟馬森矗萬人戈信有淮陰令銜枚夜渡河

井陘西上故關

是日陰翳

雪艷騰騰長天容黯黯低千重無路入一望使人迷日
午憑雞唱雲生傍馬蹄山川分趙魏關路隔東西

過北關

八月三日

舊雨侵泥滑連朝得曉晴土窑留樹蔭山路逐泉聲近
塞風先勁中秋月乍生幾家田石坂辛苦望收成

定襄雨中

細雨重門寂新涼病骨清
河山襄子國關塞代王城
獨夜聞雞早高雲過鳥輕
斷橋題豫讓身後尚留名

涇陽道中曉行

古樹捎殘月孤燈映遠村
聞雞憐曠野驅馬上高原
戀主心逾切安身事不煩
東風吹曉夢只許繞柴門

寄題郭復齋太守別署二首

城上樓臺迴山中日月開
眼空人獨坐吏散客頻來
泉

石秋先到詩篇手自裁
隔溪花發處時有鶴飛回

二

山水東南郡經營復此中
渚花嬌欲語海鶴舞成童
曲徑重重月迴闌面面風蓬
萊元不遠城外弱流東

送朱守忠無懷山陰舊遊

我昔登南鎮山陰一水東
禹功思玉帛秦刻卧魚蟲
古有神仙宅今傳王謝風
獨懷詞賦悔白髮老楊雄

大浪灘

江水清不澈秋容雨復晴捲簾聞瀑坐歌枕看山行密
篠緣谿轉長松徑壑平人家翠微裏時有白雲生

玉山西下換小舟乘月

懷玉谿山路依稀記昔年秋風南國客明月下瀧船苦
愛滄浪曲誰歌白石篇甘棠是何物千古使人憐

書龜峯石壁上

四眺山俱好入山遊興長羣峯更卧起萬木半青黃輕
鳥巢孤壁流泉過疊廊幽期探未極翻憶巨靈藏

宿龜峯

一宿龜峰寺登臨願不虛巖花僧定後山果客來初峭
壁時虧蔽孤雲遞卷舒愧無康樂手疑有子長書

中秋對月二首

今夜中秋月長安向北城高梧雲意薄小草露華清氣
候關寒暑天心忌滿盈孤亭虛四壁著意傍人明

二

對酒不成醉秋光倍可憐照人偏白髮為客况青氈幾

處關山裏終宵鼓角邊未知塵世上能看幾回圓

至潼關

潼關天作險此地復樓臺一徑雲中度三川日下來東
遷周左計先入漢雄材自有蓬桑志西南萬里開

峽江道中暮色

曉山南國麗中月復冬深輕露還蒸麓幽花尚滿林北
風千疊浪西崦半帆陰何似湘江路常懸魏闕心

雪中王嵩野過公館小酌次韻

西臺梁苑客南國楚郊山共愛六花舞如登萬玉間平
原千騎出遠浦一蓑還萍水萍鄉路相看破顏

宿邯鄲

無程趨百里虛館宿邯鄲世事渾如夢春宵尚帶寒古
臺平雉堞殘月隔離闌無端是興廢人共壁俱完

十日早朝寒甚

是日致賀
皇子生

寒重春猶勒風迴雪未消旂常懸日月殿閣迴雲霄卿
相恭寅協君王視早朝天顏殊有喜臚唱颺簫韶

應制撰頴殤王挽歌四首

潛德悲天憇餘哀眷帝衷素車明落日丹旒颺淒風聚
散雲無跡彭殤數偶同人間留不得龍種自龍宮

二

玉樹難為實璇源本自清未勝桐葉剪先助薤歌聲祖
祭公卿集皇恩父子情堂封千古地佳氣五雲平

三

瑤圃秋先到珠林露易晞千官歌執紼萬乘淚霑衣正

氣蒼冥闊佳城紫翠圍多應是神物華表鶴重歸

四

皇膺分天派仙才降帝居如何埋玉日方及晬盤餘不
見東平禮空傳北海書英靈同大造消息任盈虛

新鄉道中

望國還鄉路南人北客心鬢毛霜欲滿時序夏初臨宿
雨風塵淨遙山紫翠深蘇門精舍近悵望負幽尋

曉發新鄉

落月猶在屋大星欲浮空旅門人戒曉官道樹舍風隱
隱共山濕迢迢衛水東黃河舊行處指點為誰窮

淇縣道中雨濤

雨深泥滑滑一步九躋攀世路分南北人情念往還濕
雲縈細柳龍氣隱高山想像歌淇澳何如蜀道間

泛黃河

淼淼望不極連天送濁流浮沈經塞外淘洗向中州鷗
弄千帆雨沙明兩岸秋靈槎頻訊問乘興欲遨遊

赴介谿賞雪

懷鄉仍歲杪喜雪况登樓
天地俱生色江湖足勝遊
十年依鳳闕此日更狐裘
未有陽春調能為郢客酬

次介谿看牲韻

輦路金沙湧郊壇翠甃開
定須騎鶴到唯許視牲來
列炬銀花發嚴更玉漏催
上卿仙骨勝侵曉入蓬萊

送楊子濬大理得告歸嶺南

愛爾不可別欲留其奈何
池塘春草變山鳥杜鵑多
采

藥仙人侶緘梅驛使過于公好門第四海望陽和

次韻曹承之留別二首

舊京千古重許國一身輕驛路梅初發都門雪正晴
新除分畫省惜別賦春明多少臨岐客於君獨有情

二

南至三千里東風一櫂輕石頭城外曉桃葉渡傍晴客
思奚囊重鄉心畫繡明六朝佳麗地登眺若為情

送張希賢令泗會

萬里古端州分符作勝遊雲山通庾嶺風土接羅浮縣
靜仙鳧遠樓高瘴雨收未能逢故舊迴鴈有高秋

次韻送李都閩

山顛與水涯時見野人家遠湖拖白練新竹長青蛇澗
露浮雲石林藏著雨花神仙無別徑此地有煙霞

邀甬川少宰過報國寺送呂涇野致仕

赤日都門道青山故國情風前邀客過寺裏送君行有
夢憑清曉何心計去程秦川一水隔天遠九重城

舟發

風水本無定有時能送行
西郊不作雨北望獨含情
習靜憐穿榻聞歌愛濯纓
十年懷舊業六月遂南征

潞河發舟兩日夜始抵和合驛

快路日千里畏途腸九迴
古難當蜀道今日下燕臺
柳色連村暗波光映日開
北山如有待猿鶴未應猜

放任城南閘

風水自順逆物情生愛憎
任城天設險湖泊氣多蒸
相

業商巖兩君恩玉井水阮途多少意長嘯愧孫登

十四日放徐州洪逢周一之

脫險方驚險思君喜見君高山共流水覆雨更翻雲初
過留侯國行經亞父墳當年誰作計楚漢欲中分

直河晚泊

落日青山好舟行復見山楚天窮眺望河水正潺湲沙
岸人爭渡柴扉夜不關向來戎馬地此夕且開顏

河漲

輕塵高弄日新漲急翻江客子難為夜鄉心不可降村
沽聊取醉野調自成腔冥遣懷篇翰垂簾短過窻

舟中晚景偶理琴

密葉隱日脚微風盛水紋客心隨路遠人語隔溪聞過
雨甍秋穀征旂颺晚雲匣琴多古意移調奏南薰

晴發

氣爽鐘聲遠天空鳥影微檣頭分曙色席背引朝暉水
亂添新漲沙明合舊磯田家霑足否天遣遠人歸

山莊

細雨移花果來禽帖重題山林元有骨桃李自成蹊林
曠傳乾鵲村深報午雞暖泉如可浴呼杖小橋西

方竹

仙人九節杖誰琢玉成方倚石孤稜瘦捎雲列戟長莫
將三弄笛雅製獨眠牀多少圓機客輪蹄滿道傍

雪後

風雪初開野江潮已到門水深三畝竹春蚤一墀萱無

事偏宜懶初心苦畏喧不應吳市裏自有辟疆園

儼山集卷八

欽定四庫全書

儼山集卷九

明 陸深 撰

七言律詩一 五十首

長至侍班

白玉闌干動曉容，鳳笙吹律應黃鐘。
侍臣躡履趨金殿，天子垂衣覆袞龍。
雲裏雪花依仗落，爐間香氣入簾濃。
却看下界羅星斗，身在鈞天第幾重。

南郊駕出

南郊清禁鎖乾文時倚齋居望瑞雲帝輦欲來香滿路
宮門乍啟曉初分芝房桂棟園丘殿虎旅龍驤太乙軍
昔日楊雄空麗藻唯將羽獵奏明君

駕入

龍旂日射九關開鳳輦風高萬乘來皇國山川自迴互
碧空雲物尚徘徊依微花柳迎春仗次第王侯獻壽杯
漢時唐封俱鄙陋虞書周典共昭回

東山草堂一首送東山劉先生致仕

堂成十載畫扁扉不負山靈將相歸
物外漁樵相問答堦前猿鶴有光輝
偏宜夜月涼先到可忍春雲濕未飛
想得夜闌還有夢龍紋時動篔簹中衣

賦得新鷺

花裏新鷺高復低遍身金縷養初齊
自來幽谷偏求友慣領東風試學啼
何處王孫停柳外十年征戍憶遼西
上林喬木知多少他日一枝應借棲

秋聲

高閣煩襟生遠興，忽聞涼籟動羅幃。
隨風已去傳鳴柝，傍月還來助擣衣。
疑有波濤從地起，獨憐烏鵲正南飛。
長安此夜悲秋客，細數流年感是非。

秋興二首

細雨兼風若有情，樹邊樓裏伴秋清。
候蟲燈火黃昏永，客子衣裳白苧輕。
魂夢幾番偏故國，襟期何處慰平生。
壁間更與悲團扇，卧聽梧桐落葉聲。

帳望西山宿雨晴
新涼高閣夢魂清
秋於景物三分變
老覺功名一念輕
日課就荒詩草少
月支無補俸錢贏
長安歲歲逢搖落
宋玉情多鬢易星

秋日慧昭寺訪舊迷道

不是桃源路亦迷
客心隨馬自東西
蕭疎榆柳如前歲
依約樓臺記隔谿
入寺緒風秋較早
照牕斜日鳥偏啼
憑誰指點還歸去
頭白山僧有杖藜

秋日會通河送客

京國三年思故國黃花時節又登臺清江水冷魚龍伏
落日天空鴻鴈來忽漫逢人渾似夢常因送客暫開懷
鱸魚蓴菜江東地不為蓴鱸也合回

與徐昌國登雞鳴山

臨風蕭散撒荆扉緩步相攜上翠微試日丙丁看塔影
賭松寬窄解腰圍路侵壁水分鳴鐸石近僧床掛衲衣
滿目樓臺形勝裏當年辛苦憶龍飛

送林見素都憲撫江西

閭闔天開袖疏來先皇深意獨憐材江搖旌旆雲霞遶
詔剪絲綸日月迴千里藩垣聊試手百年海嶽幾生才
故山聞說饒猿鶴滿地蒼生半草萊

送劉直夫歸省還江西

羣聯共愛挹蘭芳南浦魂銷一舉觴君獨有親甘去國
我寧無夢繞高堂天連鳥背迷寒雨江引漁梁出曉霜
珍重天涯易回首官橋春日柳條長

雙挽

蕭蕭松柏北邙道連理凋殘風日清地下有靈龍合劍
人間無主鶴歸城山西短日迷椿影機上殘燈照雨聲
四尺碑頭字如掌行人讀遍汝南評

元宵

滿街燈火雜游塵消受風光五日春

時十日
立春

微雨澹雲

城上月紙燈茅店客中身家遙隔歲書隨鴈山近當牕
鬼笑人佳節不殊心賞異梅花新水獨相親

破曉出水西門往江口途中作

城西買馬滑衝泥，總為風光候指揮。
拍案寒潮驚曉枕，過江殘雪上春衣。
梅花野寺初聞磬，楊柳村居半掩扉。
曙色漸分人漸遠，五雲雙闕擁朝暉。

子殤后二首

消瘦腰支減練裙，異鄉音信可堪聞。
青春滿面殤兒淚，白骨三遷幼女墳。
萍水飄零風顫雪，文章消息雨收雲。
業緣尚有迂癡在，愛惜圖書未敢焚。

磨蟻旋旋意緒同，傷春隨處怯東風。
三年未了隆中卧

一旦誰收稷下功
滿徑藥苗因病減
隔窗蕉葉為書空
細尋舊事輪纖指
雲水今朝是幾重

夜宿龍江驛

風塵隨分三年住
燈火江村一夜留
入市女郎能買酒
懷家游子怯登樓
烟中舟楫來京口
雲裏鐘鈴出石頭
水淨更闌不成寐
隔船鄉思起吳謳

入京口聞

沙城擾擾人歸市
喜色津津客過關
船外寒潮隨白鳥

樹間花氣繞青山，夢魂風雨今宵減。
鄉國門墻五日還。
百里波濤幸無恙，滿卮村酒慰慈顏。

入晉陵西門往東門晚泊

百年雨露長繁華，煙柳長堤入市斜。
石岸樓船載簫鼓，朱闌簾幙護鶯花。
軟泥驛路人調馬，細水溪橋女浣沙。
待泊黃昏更東下，滿城燈火萬人家。

春暮還舊隱花木半存憮然拈筆有作

淡花疎竹舊簾櫳，墻暈苔痕碧土濃。
春燕定巢應識主。

夜蛾隨幌獨憐儂
池塘課僕添栽藕
杯豆留人半采葑
僻絕吾廬偏不厭
枕書日日卧高春

夏日幽居即事

手汲清泉和碧煙
細臨晉帖滿吳箋
南風送暑催三伏
西日下山留半圓
丹柰雨肥禽著意
畫梁泥足燕高眠
方床高結跏趺坐
我與幽居信有緣

書扇寄王天錫乃兄天則

梅花歲歲憑君折
折盡梅花第幾枝
樹杪暮雲看去遠

江湖游鯉到來遲
詩今點竄成千首
路已經過熟九疑
坐對惠連談往事
夜來應夢草生池

挽周處士

生前不識處士面
身後空成處士吟
小雨荷香池館靜
暖風花信草堂深
青山昨夜悲埋玉
流水何年到賞音
四尺碑頭數行墨
菴溪松柏自蕭森

寄王瑩中

定山風景近何如
江月江潮遶故廬
龍洞舊游春服就

太玄新著夜窓虛滿川花柳三盃裏隔岸樓臺六代餘
我獨長安經歲晚南來目斷數行書

落花

蝶粉蜂黃冷浣溪衰顏無主畫樓西情緣偏戀鴛鴦水
勲業多留燕子泥荏苒芳塵湘魄化飄搖紅雨蜀魂迷
池塘倍覺朝來勝新綠成陰護鳥啼

館中書事

深既入館司禮監太監蕭敬者在上前言進士陸深

徐禎卿意若幸予而惜昌穀之不偶數日後同年數輩在左闕門接本有中人問之曰爾進士中有陸深徐禎卿者衆皆愕然不識其故漫應之曰然曰前日蕭太監為至尊言之如此衆以告予予驚且懼賤姓名何以達于中貴因識以詩

疎慵舊業大江東十載雕蟲愧未工豈有才名驚行輩徒勞中貴達宸聰少年賈誼吾安敢今日相如事偶同自笑子虛無賦草親將迂策獻重瞳

末意謂深雖被蕭監之薦然以迂樸之學受
知先帝故有是命與楊得意薦相如者異矣

馮侍御野雉坪

蕪莽頻年雜採樵山靈留此託高標
紆迴負郭瓜田近平遠如村石迢迢
日暖林端飛雉子雨晴澗尾送魚苗
功成廊廟懸車處應有芳名配午橋

張家灣志哀

五年此地往來過人事悲歡奈爾何
涕淚偏從寒夜墮

月華空自海門多天邊衰柳連村郭囊裏殘書廢蓼莪
沙際一燈人語寂北風流水共悲歌

長女卒後復攜家渡江

趨朝入市總無緣江上新開二頃田水閣茅堂元自得
酒懷詩興故依然夕陽度嶺人吹笛秋水臨門客繫船
尚有舊書三百軸海雲江月共年年

送熊元交使越

山水蒼蒼古越州菱花荷葉共維舟二高峯頂三更日

七里灘聲五月秋
靈雨自隨征旆去
綵雲常傍使星流
江南江北還相望
兩地各登高處樓

送顧與成使浙江

江南此去經年別
更欲殷勤不可攀
細雨出城春淡泊
斷水辭岸水潺湲
風花碧落鶯遷谷
燈火黃昏吏報關
歸計越中須作早
石渠諸老待君還

邵氏園亭

主人池館玉橋東
盡日輕塵不度風
黃鳥愛啼墻曲裏

綠雲常護日方中
茶分陽羨家園好
地接長安客況同
何似更當良燕夜
月痕花影淡簾櫳

雪夜聽沈仁甫談鄉事

鄉事連牀話未休
春寒寂寂送春愁
素衣憐子客千里
畫燭搖人風滿樓
燕地雪花偏入暮
故園楊柳幾經秋
多情若問吳淞水
猶繞儂家日夜流

秋丁國學分祀

瑤壇夜氣屬秋清
禮殿衣冠肅上丁
風度簫韶聞九奏

露垂銀漢轉三星青松團蓋飄香篆白玉圍闌映舞翎
聖道彌高垂萬古皇恩罔極授羣經

題石淙二首

為師相
楊先生

入雲娟娟石泉流回首青山憶舊遊天柱雪消銀瀑下
海門日照紫烟浮即看烏背三台路疑有軍聲萬里秋
此地到江龍窟近化為霖雨滿神州

滇水湘山故有情石淙又紀勝遊名坐來風雨聞韶護
挽作天河洗甲兵曉出五雲隨日捧寒流千折到江清

暗通氣脈金山寺更表東南鐵甕城

長陵

文皇功業冠吾朝極目長陵北斗高
龍虎千重常隱霧松楸萬壑驟聞濤
禮成寢殿嚴三獻版署曾孫饗太牢
淺薄小臣叨法從夜分端拜擁青袍

景陵

景陵東奠接蓬瀛長憶宣皇致太平
弓劍闕嚴龍氣合樓臺環瑣斗杓橫
地高海嶽依依見天濶風雲冉冉生

金步上
卷十
萬歲千年隆禮典羣官偏許夜深行

劉蕡祠二首

諫議千年自有祠唐朝宮闕黍離離多情瘦馬衝寒到
無數青山落照遲往事空傳臺下駿靈風常滿廟前旗
水霜入夜頻搔首欲奠芳椒侑楚詞

門帶水堤一徑隨丹青寥落見風儀當年去國呈秋卷
同輩看花滿麗詞言論縱危終愛主英雄空好不逢時
客來繫馬祠前樹獨坐寒山有所思

夜坐念東征將士

長河乘夜渡，貔貅兵氣如雲擁。
上游大將能揮白羽扇，君王不愛紫貂裘。
十二關山齊故國，百年疆域漢神州。
不眠霜月聞刁斗，自啟茅堂望斗牛。

書扇贈何子元武選

春風吹墮洞庭舟，春日来從鸚鵡洲。
萬國風塵隨獨客，五更煙月下中流。
天邊城闕身重到，笛裏關山鬢已秋。
坐憶五年江海別，楚雲吳樹各登樓。

赤水村登土岡同何子元武選張子醇儀制賦

得春字

林館來遲已暮春，追攀且得共高人。
貪山更送雲中目，避日時移樹裏身。
臺殿近瞻龍氣繞，笙歌聊代鳥聲頻。
城西亦是風雲地，不遣登臨負此辰。

赤水村與方道士

赤水村西風日晴，紫琳宮裏鳳簫聲。
經冬翠竹搖仙珮，萬里青山遠帝京。
休沐偶過花院靜，盤飧無愛藥苗清。

主人已得長生訣我輩空懷遺世情

思歸飲欽之館

鄉心迢遞鬱難開且醉佳人舊酒杯千里鴈書迴隔歲
五湖雲樹鎖高臺遙聞河北兵還滿坐看長安月又來
容取腐儒江海上仗君終作濟時才

病起見庭萱有作

堂背花開空復情客衣偏感歲年更滿庭綠蔭飛新燕
無數鄉心啼亂鶯病後強題眠食健鏡中常為鬢毛驚

黃金臺上頻回首慙愧當時買駿名

鄭家口晚眺

落日曠野飛沙平微吟捲席登岸行垂楊綠暗夕露下
細草碧鋪晴月明空闊試窮遠望目飄零每動思家情
明發一舟何處所江湖隨到問鷗盟

戲馬臺晚眺

王氣蕭條伯業收彭城依舊碣山秋山連青郡無齊繞
水合黃河入海流漠漠雲邊低度鳥踈踈樹杪送行舟

凌空臺閣宜春望尚及西風半日遊

儼山集卷九